

senza lavor alcun, excepto che oro messo per de-  
pensor.

*Præterea* sia *etiam* banditi i ziponi fati a la francese, camise a la francese crespade, roboni, calce strichade, zocoli et scarpe sì de homeni come de donne, che sia contra la leze, ma siano schiete, et ogni altro habito et portamenti de abiti che siano contra la forma de le leze prese in ello excellentissimo consiglio de' Pregadi, dechiarando che i ziponi non possi esser imbotidi salvo al colar et al traverso, secondo disponeno le leze et ordini presi nel dito excellentissimo consejo de' Pregadi. Le qual tutte cosse observar se debiano sotto tutte le pene contenute nelle parte prese sopra de ciò. Et aciò le prediete leze babino la sua debita execution, l'è preso ne l'excelso consiglio de' Pregadi, a dì 17 de l'istante, che li magnifici provedadori et executori sopra le pompe non possano far gratia alcuna alli condannati, che *immediate* se intendono cazudi alle leze sotto pena de pagar del suo proprio, et sia obligado el nodaro del suo officio portar in Collegio ogni mese al Serenissimo Principe una poliza de quelli saranno condannati, acciò Sua Serenità, vedendo esser stà contrafatto, faci notar per debitori li ditti magnifici provedadori et executori, che non havesseno osservà la parte. Sono *etiam* obligati li ditti signori far diligenti inquisition delli contrafacenti, et per la ampla libertà che à uno de inquisir, procedere, examinar, metter pena et astrenzer cadauno per el suo officio come a loro parerà; et non 'poleno i ditti signori esser pregadi circa alcuna cosa de l'officio suo sotto tutte quelle pene et strecture che ne le parte se contien, dechiarando che quelli saranno trovati haver contrafatto in alcuna cosa, over portar le cose preditte devedate, over alcuna di quelle, saranno spoiati li habiti et vestimenti, et saranno presi, et oltre de quelli saranno condannati irremissibilmente secondo la forma de le leze senza gratia alcuna. *Item*, se de le preditte cose devedate ne serà accusadori, che sia schiavo over schiava che accusarà, saranno franchi et liberi; et s'el sarà fameio, over fantesca scritta a salario, se intenda haver compido el suo tempo et habia tutto il suo salario, et oltre di questo la parte de la condanason.

59 A dì 17, la matina, in Colegio veneno insieme li oratori Papa et vicerè over Spagna, et steteno longamente a consultar *quid fiendum*; et fo terminato expedir, questa matina, Vincenzo Guidoto secretario nostro con barcha al vicerè in Ancona, a exortarlo non si parte, et voi redunar l'exercito, perchè

francesi è stà loro i roti, offerendoli e danari e quello achaderà, notificandoli l' orator suo domino Zuan Batista Spinelli conte di Chariati existente qui, è per venir de li subito e portarli danari etc. Et per lui fu replichato le letere a l' orator nostro in corte, inanimando il Papa et mandandoli li sumarii di le nove si ha di Mantoa e Chioza; et cussi partì ditto secretario questa matina. Et perchè l' orator yspero sollicitava a la Signoria mandarli danari, perchè die-  
no aver ducati 12 milia per resto di una paga livrata etc., fo dito se li manderia, et non eramo per manchar; e cussi dito orator partirà doman de note con una galia Liona per Ancona. La qual galia era a Poveia, soracomito sier Antonio Lion qu. sier Piero, qual per esser amalato, era suso sier Hironimo Lion so fradelo in suo locho, et fu dato sovencion ozi a li galioti ducati 3 per uno; et a numero 70 homeni nuovi, che manchava, ducati 5 per uno per interzarla, et sier Lucha Trun executor ave questo; sichè è in ordine. Fo cavato di l'arsenal la galia di sier Hironimo Capello sopracomito, et si armerano sier Anzolo Trun e lui sier Hironimo Capello, *immediate*.

Noto. Eri sera gionse fra' Francesco Zorzi di l'hordine di San Francesco predicator excellentissimo et miò zerman cuxin; vien da Mantoa, dove questa quaresima à predicato. Dice assa' cosse, et fo dal Principe e referi esser stato a Ferara, e di la rota di francesi e non mancho di spagnoli, et come a Ferara à inteso, francesi vegnirano parte a Ferara et col Duchia, che si aspetava, e passeriano sopra il Polesene nostro. *Item*, disse quanto il marchexe li havea dito dicesse al Principe, e come vol far, e altre particolarità.

Da poi disfar, fo Consejo di X con la zonta, et fonò sopra danari per trovar ducati 12 milia di mandar in campo di spagnoli, zoè al vicerè, per resto di quello dia aver. Et fo parlato di mandar, per Colegio, uno nostro zentilhomo fino li a veder, sì dito campo si pol redur, darli li danari, altramente no; el qual anderà con la galia Truna, si armerà. *Item*, fo eleto uno provedador sopra le biave in locho di sier Alvise Malipiero, fo savio dil Consejo, che fo electo, el qual si scusoe per haver parte in merchandantia di biave, poi è ussito di Colegio. Et fo electo sier Andrea Foscarini fo provedador a le biave qu. sier Bernardo. Cazete sier Piero Capello fo savio dil Consejo qu. sier Zuan procurator, sier Marco Antonio Loredan fo cao di X, sier Thomà Lion fo provedador a le biave, e alcuni altri.

Vene Hironimo di Alberti secretario di sier Marin Zorzi el dotor, era orator nostro al vicerè, el